

## Dogri (NSD) Bulletin

10-01-2026

1. प्रधानमंत्री नरेन्द्र मोदी अज्ज गुजरात जागंन- जिस दरान ओह "सोमनाथ स्वाभिमान पर्व" ते होरनें बड्डे विकास कार्यक्रमें च शामिल होगंन।
2. संसद दा बजट इजलास 28 जनवरी शा शुरु होग ते 2 अप्रैल तगर चलोग।
3. प्रमुख सेना अध्यक्ष सी.डी.एस. जनरल अनिल चौहान होरें आखेया ऐ जे पाकिस्तान च फौजी ते संवैधानिक बदलाव- आप्रेशन सिंदूर दरान सामने आई दियें पाकिस्तान दियें कमज़ोरियें गी दर्शादि न।
4. हिमाचल प्रदेश दे सिरमौर च पेश आए दे दर्दनाक बस हादसे च 14 लोकें दी मौत ते 33 जनें ज़ख्मी होई गे न। प्रधानमंत्री होरें सींधी सहायता दा ऐलान कीता ऐ।
5. ते महिला प्रीमियर लीग क्रिकेट च रायल चैलैन्जर्स बेंगलुरु नै पिच्छली बारी दी चैम्पियन मुम्बई इंडियन्स दी टीम गी कल 3 विकेटें कन्नै हराई दिता।



### PM -Guj Visit

प्रधानमंत्री नरेन्द्र मोदी अज्जै थमां गुजरात दी त्र'उं दिनें दी जात्तरा पर जाडन। श्री मोदी स'झां लै सोमनाथ पुज्जडन ते ओंकार मंत्रोच्चारण च शामिल होडन। ओहू सोमनाथ मंदर च ड्रोन शो बी दिक्खडन। प्रधानमंत्री होर ऐतवारें शौर्य जात्तरा च बी हिस्सा लैडन। एहू जात्तरा सोमनाथ मंदरै दी राक्खी लेई अपनी जिंदुएं दा बलिदान देने आहले अनगिनत योद्धाएं दे सम्मान च आयोजित कीती गई ऐ। श्री मोदी सोमनाथ मंदरै च दर्शन ते पूजा अर्चना करडन। प्रधानमंत्री सोमनाथ स्वाभिमान पर्व च बी हिस्सा लैगन। एह्दे परैन्त, प्रधानमंत्री होर राजकोट जाडन ते कच्छ ते सौराष्ट्र लेई आयोजित वाइब्रेंट गुजरात क्षेत्रीय सम्मेलन च शामिल होडन। श्री मोदी इस सम्मेलन च इक बपार मेले ते प्रदर्शनी दा उद्घाटन करडन। प्रधानमंत्री होर राजकोट थमां अहमदाबाद लेई रवाना होडन ते ओहू सेक्टर

10ए थमां महात्मा मंदरै धोड़ी अहमदाबाद मेट्रो दे दुए चरण दे बाकी रौह्दे हिस्सा दा बी उद्घाटन करडन।



## Parl Budget Session

संसद दा बजट आहला इजलास इस महीने दी 28 तरीक गी शुरु होइयै 2 अप्रैल धोड़ी चलोग। इस बारे जानकारी सांझी करदे होई संसदी कार्ज मंत्री किरिन रिजिजू होरें सोशल मीडिया पर दस्सेया जे बजट इजलास दा पैहला गेड 28 जनवरी गी शुरु होग ते 13 फरवरी गी खत्म होग- जिसलै जे दूआ गेड 9 मार्च गी शुरु होइयै 2 अप्रैल गी मुक्कोग। रिजिजू होरें दसेया ऐ जे राष्ट्रपति होरें दौनें सदनं दा सत्र सदनं दी मंजूरी देई दिती ऐ।



## CDS -Op Sindoor

प्रमुख रक्षा अध्यक्ष जनरल अनिल चौहान होरें आखेया ऐ जे पाकिस्तान नै आप्रेशन सिंदूर दे बाद अपने फौजी ते संवैधानिक ढांचे च तेजिया कन्नै बदलाव करियै- इस संघर्ष दौरान सामने आई दी अपनियें कमियें गी स्वीकार करी लैता ऐ। कल पुणे लोक नीति उत्सव गी सम्बोधित करदे होई सी.डी.एस चौहान होरें आखेया जे पिच्छले बरे अप्रैल महीने पैहलगाम च होए दे आतंकी हमले दे बाद शुरु कीता गेदा आप्रेशन सिंदूर अजे खत्म नेई होआ ऐ- इसी छडा रोकेया गेदा ऐ। उनें आखेया जे आप्रेशन सिंदूर नै पाकिस्तान गी संवैधानिक तरमीमें लेई मजबूर करी दिता ते उसी अपने संविधान दी दफा 243 च तरमीम करियै Joint Chiefs of Staff कमेटी दे अध्यक्ष दे ओहदे गी खत्म करियै- ओहदी थाहर Chief of Defence Forces दा नमां ओहदा त्यार करने पर मजबूर होना पेया ऐ। एहदे नै ज्यादातर इख्तयार इक्के आदमी तगर महदूद होई गेन।



## Shah -Drug Free

इस बरे 31 मार्च थमां पूरे देशे च नशारोधी अभियान शुरू कीता जाह्ग। त्र'उं बरें तगर चलने आह्ले इस अभियान दा मकसद देशे गी नशा-मुक्त बनाना ऐ। गृहमंत्री अमित शाह होरें कल नमीं दिल्ली च नार्को-तालमेल केंद्र दी 9मीं बैठक च एहू गल्ल सांझी कीती। उ'नें आखेआ जे नशीले पदार्थे खलाफ लड़ाई च केंद्र सरकार दे सबनें विभागें गी 2029 तगर दा खाका तैयार करी लैना लोडचदा ते इसपर समेंबद्ध ढंगै'ने अमल करने लेई समीक्षा-तंत्र बी स्थापत करना लोडचदा ऐ। उ'नें नशे दी समस्या कन्नै निब्बड़ने लेई 31 मार्च तगर मसौदे तैयार करने दे निर्देश दित्ते ते पुलस महानिदेशकें गी अपील कीती जे ओहू जब्त कीते गेदे नशीले पदार्थे गी समें पर नष्ट करने आस्तै ठोस गैहीं पुट्टन। गृहमंत्री होरें आखेआ जे प्रधानमंत्री नरेन्द्र मोदी हुं'दे नेतृत्व च देशे नशे दी समस्या कन्नै निब्बड़ने च बड़ी मती कामयाबी हासल कीती ऐ। श्री शाह होरें आखेआ जे नशीले पदार्थे दी आपूर्ति श्रृंखला गी खत्म करने लेई इक सांझा ते सटीक नजरिया अपनाने दी बड़ी सख्त लोड ऐ। गृहमंत्री होरें दस्सेआ जे बरे 2014 थमां 2025 बश्कार इक करोड़ 11 लक्ख किलोग्राम नशीले पदार्थ जब्त कीते गे न, जिं'दी कीमत इक लक्ख 71 हजार करोड़ रपे ऐ। गृह मंत्री होरें इब्बी आखेआ जे नशीले पदार्थे खलाफ लड़ाई च फॉरेंसिक साइंस लेबोरेटरीज दी भूमिका महत्वपूर्ण रेई ऐ।



## Himachal Pradesh- Bus Accident

हिमाचल प्रदेश दे सिरमौर जिले च पेश आए दे इक बस हादसे च 14एं जनें दी मौत होई गेई ऐ ते 33 होरनें दे घाऽल होनें दी खबर ऐ। एह हादसा उसलै पेश आया जिसलै सोलन थमां हरिपुरधर जा रदी बस- जेहदे च 66 सोआरियां बैठी दियां हियां- इक डूंहगी खड्डे च जाई

पेई। घाऽलें गी IGMC शिमला दाखल कराया गया ऐ। मुख्मन्त्री सुखविंदर सिंह होरें सिरमौर जिला प्रशासन गी निर्देश जारी कीता ऐ जे घाऽलें दे इलाज च कोई कसर नेंई छुडी जा। राष्ट्रपति द्रौपदी मुरमू- उपराश्ट्रपति सी.पी. राधाकृष्णन ते प्रधानमन्त्री नरेन्द्र मोदी होरें हादसे च कीमती जानी नुक्सान पर गैहरा दुख प्रगट कीता ऐ। प्रधानमन्त्री नरेन्द्र मोदी होरें मारे गेदे लोकें दे आश्रतें लेई 2 लक्ख ते घाऽलें गितै 50-50 ज्हार रपे दी मदाद प्रधानमन्त्री राश्ट्रीय राहत कोश चा देने दा एलान कीता ऐ।



## Delhi-World Book Fair

नमीं दिल्ली विश्व पुस्तक मेले दा 53मां संस्करण अज्जै थमां नमीं दिल्ली दे “भारत मंडपम” च शुरु होआ रदा ऐ। इस मेले च 35 मुख्बें दे इक ज्हार शा मते प्रकाशकें दियां कताबां उपलब्ध होगंन। मेले दा उदघाटन केन्द्री शिक्षा मन्त्री धर्मेन्द्र प्रधान होर करगंन।



## Creator's Corner

सूचना ते प्रसारण मन्त्री अश्विनी वैष्णव होरें आखेआ ऐ जे प्रसार भारती दे वेब्स प्लेटफॉर्म गी आलमी सतह उप्पर बडी मती सराहना हासल होई ऐ ते एह्दे'नै 5 ज्हार करोड रपें दा अंतरराश्ट्री बपार होआ ऐ। श्री वैष्णव होरें डीडी न्यूज पर कंटेंट क्रिएटर्स गी सशक्त बनाने आस्तै शुरु कीते गेदे नमें प्लेटफॉर्म ‘क्रिएटर्स कॉर्नर’ दे शुभारंभ दे मौके पर एहू गल्ल आखी। उ'नें गलाया जे प्रसार भारती दी इस नमीं पैहल दा मकसद रचनात्मक समग्री गी प्रदर्शित करना ते इसी बढावा देना ऐ। श्री वैष्णव होरें आखेआ जे सरकार ने इक करोड युवाएं गी रचनाकार अर्थबवस्था कन्नै जोडने दा लक्ष्य रक्खेआ ऐ। श्री वैष्णव होरें आखेआ जे प्रधानमन्त्री नरेन्द्र मोदी होरें पिच्छले 11एं ब'रें च केई महत्वपूर्ण सुधार कीते ना। उ'नें इब्बी

घोशणा कीती जे सूचना ते प्रसारण मंत्रालय दा इस बरे पूरी चाल्ली परतियै गठन कीता जाहग जेह्दे च इक नमीं संचालन बवस्था दा विकास बी शामिल ऐ। श्री वैष्णव होरें आखेआ जे सूचना ते प्रसारण खेत्तर देशै दे बसनीकें दे जीवन गी प्रभावत करदा ऐ, इसकरियै प्रसारण दे महत्व गी परतियै नमें सिरेया स्थापत करने ते इसी अज्जै दी तकनीक ते कम्मकाजी पद्धतियें मूजब ढालने आहले सुधारें गी लागू करना अत्त लाजमी ऐ। श्री वैष्णव होरें आखेआ जे इ'नें सुधारें कन्नै रोजगार दे नमें मौके पैदा होने दी मेद ऐ। क्रिएटर्स कॉर्नर दा प्रसारण सोमवार थमां शुक्रवार तोड़ी स'झां 7 बजे डीडी न्यूज पर कीता जाहग।



## Vaishnav -Railway

रेल मंत्री अश्विनी वैष्णव होरें आखेआ ऐ जे भारती रेल वैश्विक मानदंड स्थापित करने दी स्थिति च ऐ ते 2047 तगर भारत गी विकसित राष्ट्र बनाने दी दिशा च महत्वपूर्ण भूमिका लेई तैयार ऐ। कल नमीं दिल्ली च 70में अति विशिष्ट रेल सेवा पुरस्कार समारोह च उ'नें 100 रेलवे अधिकारियें ते सर्वश्रेष्ठ प्रदर्शन करने आहले रेलवे जोन गी सम्मानत कीता। श्री वैष्णव होरें आखेआ जे भारती रेलवे ने 2026 लेई 6 नमें संकल्प लैते ना। इ'ंदे च इक बरे दे अंदर बवस्थागत सुधार, उत्पादकता च सुधार लेई तकनीक ते आर्टिफीशियल इंटेलीजेंस दा इस्तेमाल, रक्ख-रखाऽ सरबंधी मानकें दा दर्जा बधाना, सुरक्षा दी मजबूती ते औपनिवेशिक मानसिकता गी छोड़ना शामिल ना। पुरस्कार हासल करने आहले जम्मू डिवीजन दे वरिष्ठ डिवीजनल कर्मिंशयल मैनेजर उचित सिंघल होरें आकाशवाणी समाचार कन्नै गल्लबात करदे होई आखेआ जे वंदे भारत रेलगड्डी दी शुरुआत दे बाद थमां जम्मू-कश्मीर च सैलसफा गी बड़ा मता लाहू हासल होआ ऐ। पुरस्कार हासल करने आहली इक होर अधिकारी सीनियर

असिस्टेंट लोको पायलट सुष्मिता होरें आखेआ जे पुरस्कार कन्नै कर्मचारियें गी भविक्ख दिएं  
चुनौतियें दा असरदार ढंगगै'नै मुकाबला करने च मदाद मिलदी ऐ।



## WPL -Cricket

महिलायें दे प्रीमियर लीग क्रिकेट च जंदी रातीं नवीं मुम्बई च खेड्डे गेदे मुकाबले च रायल  
चैलैन्जर्स बैंगलुरु नै पिच्छली बारी दी चैम्पियन मुम्बई इंडीयन्स गी 3 विकेटें कन्नै हराई  
दिता। पैहले बल्लेबाजी करदे होई मुम्बई इंडीयन्स नै तय 20एं ओवरें च 6 विकेटें दे नुक्सान  
पर 154 रन्ज बनाए। बैंगलुरु लेई नादिन डी क्लार्क नै शानदार गेंदबाजी करदे होई 4  
विकेटां हासल कीतियां।



## Badminton -Malaysia Open

भारत दी पी.वी. सिंधु अज्ज क्वालालंपुर च मलेशिया ओपन सुपर बैडमिंटन टूर्नामैन्ट दे  
सैमीफाईनल च चीन दी वांग झी यी थमां हारी गेइयां ना। एह्दे शा पैहले सिंधु कल उसलै  
सेमीफाईनल च पुज्जी गेइयां जिसलै उ'नें दुनिया दी त्रीये नम्बरै दी खडारन जापान दी  
अकाने यामागुची दे खेड्डु थमां हटने शा पैहले पैहला सैट 21-11 कन्नै जिती लैता हा। तोआई  
भारत दे सात्विकसाईराज रन्कीरेड्डी ते चिराग शेट्टी, मर्दे दे डब्लस मुकाबले दे क्वार्टरफाईनल  
च इन्डोनेशिया दे फजर अलफीयान ते मुहम्मद फिकरी थमां 10-21, 21-23 कन्नै हारी गे  
ना।

